

**JANGGINI GIT**



**PRA-NESH KAR**



# Janggini Git

★ ★ ★

Ka'gape ang' ka'tongo  
Ka'saaniko parakna  
Pilak A'chik  
Ripengskarangna.

—Pranesh Kar.



# **Janggini Git**

—Segipa—  
**Pranesh Kar**

—Palgipa—  
**Tura Book Room, Tura, Garo Hills,  
Meghalaya**

*ARO*

**Garo Hills Book Emporium, Tura.**

---

—Chapa ka'atgipa—  
**Purna Chandra Kar**  
Hawakhana, Tura.

**(C) Pranesh Kar**

Nachenggipa—May, 1973

Dam: Gong/200

—Chapa ka'ram—  
Don Bosco Press, Tura.

## Janapsoani

Pa. Pranesh Kar-ni chimongginin poetryrangni gimin janapsoaniko dakchina mol'molako man'on anga uni segimin poetryrangko poraie nie aditan kusi onganiko man'aha.

A'selrangoni mingsa, ua antangan A'chik jatoni ong'jaba, A'chik a'songo adita bilsirangna dong-ahaon, biapni ku'sikko gisik nange skie ra'e uko aditan ma'sigipa ong'aha ine nikna man'a. Iako ua antangni A'chik ku'siko segimin poetryrangchi blak-en mesoka. Uni segimin poetryrangko nion dingtang dingtang, gital gital chanchianirangko A'chik poetryni bimango niksona man'a. Una agreba, u ni chanchianirangko parakanioba dingtang dingtang aro gital gital bewalko nika.

A'chik ku'siko sea jotanirang bang'jabeengon, segimin poetryrangko poraigiparangna sandie on'na skigiparang aro bil-gnanggiparang neng'nikani ong'engon, indakgipa A'chik ku'siko chimongginin poetryrangko niksona katchaanisan ong'aija indiba sea-jotani bidingo silroro-namroroatani aro bang'dapatroroani kamba mingsa ong'chongmota.

Ia segimin poetryrangko poraie A'chik bi'sarang aro dal'giminrangba katchaanikoson ong'aigija indiba bang'a namgnirangkoba man'gen ine anga ka'donga.

Dated, Tura,  
the 29th, Sept., 1972.

**Keneth Momin**  
*President,*  
Garó Litt. Society, Tura.

## Agansoani

Pilakna skang anga angni nangrimbegipa ripeng Pa Evarath Marak aro Pa. Locksley Momin-ko gisikra'na mik-songani onga, maina uamangni nengnikgija dakchakanichian anga A'chik a'songo ruute songdongkujaoa indakgipa knato-begipa aro rinokbegipa A'chik kusi'kko skie ra na man'aha aro da'alo ia kusi'kchian anga angni gisikni kattarangko ia chonbegipa kitapo parakna cholko man'aha. Uni gimin anga chanchia, angni ia sea-jotanichi maiba rasong aro mitelaniko man'na nangode, pilakken mangipara uamanganchim.

Iana agre, Te. Fender Marak, Pa. Hillard Sangma, Pa. Skylance Momin, Pa. Enothsing Sangma, Pa. Ira Marak, Pa. Mitra Sangma, Pa. Julius Ceaser Sangma, Te. Juberline Sangma, Pa. Crunden Sangma, Pa. Hiter Marak, Pa. Baren Bangshell, Pa. Arnold Momin, Pa. Backington Sira, Pa. Backstar Sangma, Pa. Vincent Marak, Ma. Fridina Marak, Pa. Roosevelt (Bopi) Sangma, Pa. Albert Garrey, Pa. Johnstar Momin, Te. Natalis Marak, Pa. Paryson Marak, Te. Raphael Marak, angmung rochenggipa chie'choigipa A'chik jong-nodrang aro angni pilak A'chik ripengskarang, ia kusi'kko skie ra'ani bidingo angna namen dakchakahani gimin anga uamangkoba angni ka'tong gimikchian mitelaniko on'choangmotenga.

Ia kitapo segimin mitam poidorangko "A'chik Kurang" aro "Seng'baa" ingipa segimin kitapango chapa ka'manaha Adita poidorangko git dakejakkalhe gita Pa. Evarath Marak sul on'aha. Ua sul on'gimin poidorangoniko mitam mitamko Pa. Evarath Marak antangan uniko Ma. Fridina Marak, Pa. Locksley Momin, Te. Torik Marak aro Tra. Nada Momin "All India Radio"-o chipmantaha.

Skelbee ia kitapko chapa ka'na nangahani gimin bang'a gualanirang dongnaba gnang. Ia kitapko poraina nangnikgipa sakantion anga gualanirangna kema bi'enga.

Bon'ao, ia kitapna janapsoaniko see on'ahani gimin anga mitelako man'pana kragipa "Garo Litt. Society"-ni President Prof. Keneth Momin-ko uniko ia kitapko chapa ka'atani aro namatani bidingo angna uamen dakchakahani gimin angni saksa kamkam adatanggipa Prof. P. C. Kar. Pa. Mackenson Romgimty aro Fr. George Stadlerkot a mitelna kraa.

Dated, Tura,  
Thē 2nd. Oct. 1972.

Pranesh Kar.  
(Gopal)



# JANGGINI GIT

Katta bichongrang	Jak
1. Gisikra'ani ... ..	1
2. Isolnan anga ka'sabatsranga ... ..	2
3. Chingni ka'sagipa A'song .. ...	3
4. A'sel chongmot ... ..	4
5. Kakketgipa kattarang ... ..	5
6. Re'na nangen mikkangchina ... ..	6
7. Nitogipa chiring ... ..	7
8. Chirongbitbit do'o ... ..	8
9. Dal'begipa a'bri ... ..	9
10. Bon'changja suknirang ... ..	10
11. Bebe katta aski gita ... ..	11
12. Pilakon donga nitoanisan.. ... ..	12
13. Gong'akbatgipa ... ..	13
14. Ding'karini sal ... ..	14
15. Matchok b'isa ... ..	15
16. Ma'gipa ... ..	16
17. Mandesal ong'bo (Bisaskarangna Segimin)	17
18. Oh Isol, pilakon Na'a donga ... ..	18
19. Ka'saania namjabea ... ..	19
20. Ang' ka'satang ... ..	20
21. Ka'satangni nitoani ... ..	21
22. Ka'tongtangko on'a unan ... ..	22

## Ka'satangna Segimin

23. Gisikra'ama chame ... ..	23
24. Anga namen dingtangaha... ..	24
25. Badine anga parakgen ... ..	25
26. Changni Chang nang'ko nikengon ... ..	26
27. Nape na'a waljatchio ... ..	27
28. Jajong namen denggubea... ..	28
29. Gisik nanggija nang' kamchi ... ..	29
30. Silchi-darerang nangjawane ... ..	30
31. Ong'telgipa nitoako na'a taridape ... ..	31
32. Bachinasa re'angenga ... ..	32

**Ka'satangna Segimin**

33.	Na'a re'hagen	...	33
34.	Anga nang'na baditaan ka'saachim	...	34
35.	Jensalo nang' katong bario	...	35
36.	Chame na'a napna amgenode	...	36
37.	Simsakgija maina on'jok	...	37
38.	Maina jrip jrip parakgija...	...	38
39.	Rama brange sokeaha.	...	39
40.	Mejal walo je jumangkon	...	40
41.	Nang'ni chiti jumangrangni	...	41
42.	Dongpanabe pangnan na'a	...	42
43.	Maika'e nang'ko kusi ong'atgen	...	43
44.	Na'a angko sing'genode	...	44
45.	Kal'grika bibalrang	...	45
46.	Mesokbo maini a'sel	...	46
47.	Ang' katongo nang' napachi	...	47
48.	Dongnumika skachim anga	...	48
49.	Chel'beao donge anga	...	49
50.	Jarambongni wal ong'ode	...	50
51.	Chame angna aganpabo	...	51
52.	Watnabe jani teng'suen	...	52
53.	Ramara bakrobea	...	53
54.	Mikron pangnan nongna sika	...	54
55.	Angna ka'sachongmotode	...	55
56.	Nang'ko wate gisiktango...	...	56
57.	Re'baachim grongna nang'ko	...	57
58.	Simila pul-bibalrang	...	58
59.	Baditaan ka'saachim nang'na	...	59
60.	Anga angni sukrangko	...	60
61.	Nang'ni bichal gita	...	61
62.	Angna agangija na'ade	...	62
63.	Sengsoa oh ang' katong	...	63

**Ka'satangko Gisikra'ani**

64.	Gisik maina dingtang ong'jok da'alo	64
-----	-------------------------------------	----

## **Gisikra'chengani**

Jean on'jok ang' ka'tongo bang'en kattarangko  
Uarangchin gitrangko dakjok gisik ra'enba U'ko.

## **Isolnan anga ka'sabatsranga.**

Jean angna a'gilsakni pilakkon on'aha  
Unan anga ka'sabatsranga bate gipinrangna.  
Nitogipa a'gilsakko anga man'paaha  
Ua ka'sae on'a mikronrang dakehakani baksa.  
Una agre kartongkoba Ua on'jok angna  
Sukni sukrang dukni saarang masie rapachina.  
Ua on'jok aman' kartong bang'bea ka'saan' baksa  
Jena agre man'kujachim janggitangko man'na.  
Ang' bebera'a Un' kartongo angna ka'saan' gapa  
Jean bon'na amja aro channa chansokpilja.

## **Chingni Ka'sagipa A'song**

Skon' kosak salgi rikrak  
I'chi u'chi joka chimik  
Duuljok tangsek a'brirangchi  
Diltugipa burungrangchi  
Indakgipa nitogipa  
A'song ong'a Meghalaya.

Burung bolgrimo do'drang ring'a  
Bibalni rongrang ka'srokata  
Aram kal'grika a'bri baksa  
Balwara bolni cheksi baksa  
Indakgipa nambegipa  
A song ong'a Meghalaya.

Pilak jatrang songdong a'chaa  
Soksan cha'pagipa gita  
Rake kimkro kamko ka'a  
Je a'songni namgnina  
Uan ong'a Meghalaya  
A'song chingni ka'sagipa.

---

## **A'sel chong'mot**

**A'gilsaka nitobea ong'telaianichi  
Nitoade ong'na man'a mikron donganichi.**

**Ma'gipade pangna jolnan  
Ong'a ka'sagipa  
Ka'tongtangni giminsaan  
Ka'saani gapa.**

**Mamung rongrang donggijade sundare ong'ja  
Uandake mandeba chanchianigri ong'ja.**

**Chua, ona pangnan donga  
Janggio me'suani  
Me'sunika indioba  
Sinan kenanichi.**

---

## **Kakketgipa kattarang**

Mahamaha dake darangni janggi tanganio  
Mamung sukan dongja pangnan ia a'sako.  
Pilak janggian ianode pangnan sina nanga  
Namgnina dakgimin kamrangsaaan tanga.

Katta mingsa ka'tongtango mamung parakgija  
Chanchiani mangmang ong'a, katta uko mingja.  
Chiring gita jokangani aro bil dongjaode  
Budepa ba buchumajok, dambe ong'ja uade.

Katta mingsa ong'katahaon ia ku'sikoni  
Mamung cholan dongjawaha uko ra'pilani.  
Uandake ka'tong changsa ka'sagrikahaode  
Ra'pilnade man'jawaha kakket ka'saakode.

---

## Re'na nanggen mikkangchina.

An'ching janggin dakgrikramo chean' gitko ring'na  
Re'na nanggen jedakeba pangnan mikkangchina.

Chu'sokgijan' kenbegni walko janggil done  
Indioba knal salna sakprakan niso  
Je kamrang re'baenga an'ching sakprakprakna  
Chu'sokatna nangachime u'rangko watchanggija.

Susaa amgiparangni biapsa a'gilsakde  
Indiba amgijagiparangna dongjane biapde.

Kalimani duknirangko pilakkon gual  
Ka'ding katchaanirangko am'naha indide  
Hai an'ching ra'na uko jaktang biltango  
Sualgrikna kusi ong'e an'tangtang gisepo.





## Nitogipa Chiring

Nitogipa chiring na'a neng'takja pilakoba  
Chroke git sulrang baksa re'angenga banona.

Nang' atchiram biapara a'brini ku'chotosa  
Jekon pangnan pindapa suuri gipokrangchisa.  
Haida chakna amjakon suurini chiktotako  
Unan watangengakon na'a ua biapko.

A'brin' ja'pa burungo na'a dongna namnikja  
Maina kenanian gapa unon janggi tangna.

A'kawen' nitoasan maiba muni nangata  
Jeni a'sel ka'sinbee na'a u'chin pangnan joka.  
Un' nitoa biapba nang' chu'ongnikatjakon  
Re'angama unasa am'emungba tom'tomaon.

— — — — —

## **Chi·rongbitbit do'o**

**Chi·rongbitbit do'o angni, ring·ronga git gipinni  
Knatimna on'bo da'alo nang' ka'tongtangni.**

**Nambatgipa cha'anirang on'gen nang'na cha'na  
Aro na'a namnikjaode ia wa'ani kacha  
Ong'jaode sonan' kacha nang'na on'skagen  
Jeon na'a rani gita janggi tangna man'gen.**

**Indioba ua gitrang ring'na man'jaode  
Ra'piltokgen pilak gamko nang'ko ka'onange  
A'rikatgen unon nang'ko biramgipa gita  
Apalbea ia salgi niksokgijaona.**

---

## Dal·begipa a·bri

Dal·begipa a·bri na·a nang' mikkangni ramao  
Baditana senge donggen nitimemung sako.

Na'an batsranggipa aro seng·ba seng·batgipa  
Hajal hajalrangna bate pilakkon nikman·aha.  
Duknirang ba sukniranga bang'en batangaha  
Uarangko nikipade na'an saksanaha.

Duknirangchi bnekaha. nang' mikron, mikkango  
Bang·arangan chu·sokaha kusichi chuao.  
Gimik re·angaha salsao indiba re·bapiljaha  
Agitalrang uamang' biap songdong a·chaskaha.

Maibaka·e sengna nangjok uni ku·rangrangna  
Indioba na·aba u·ia ua re·bapiljawaha.  
Kakketara, ku·rachaka mamungba gamchatja  
Ka·dongani kal'e roa jeon bebe dongja.

## **Bon·changja suknirang**

Bon·changja suknirang pangnan ia a'sako  
Gronga gimikko jeoba mikkango.  
O, am'enggiparang! man'engama pilakan  
Salsalanti na'simang katchaani.

Neng'skima aro gramchirang  
Ong'aha da'nang uamangna dukan.  
Indioba chu'ongpaja  
Nikeaha atam sokbae nangg'nirangko.

Kengokjana gisiko ka'angkuna ka'dongao  
Chu'sokani re'bagen joton ka'e ja'mano.

Ka'dingsmite ka'bo kamtangko  
Ritchengatpana dukni balrangko.  
Gisikni bilna katchana apsan  
Ong'angpagen chu'sokgipa an'chingba salsao.

— — — —

## **Bebe katta aski gita**

**Bangbang tangsim chel·beao a'sak salgisako  
Dingdeenga nitobee askiranga uno.**

**Uaranga bibalrangsa jean balgaoenga  
Ruronggijan balkamenga chasongni chasongna  
Nitogipa nitobata balgaoengan' baksa  
Andalani janggirangna ka'srokani on'a.**

**Nama gisik a'gilsakni biap a'kaweo  
Bebe katta chaengachim aski gita uno.  
Uaranga balgaoenga pangnan bon'changgija  
Kakket ramao darangkoba dilpachina gita.**

—————

## Pilakoan donga nitoanisan

Jechi re'a, jeko nika pilak a'gilsakni  
Pilakoan nitoanisan gisik mikmalani.

Knatoa do'drangni gitrang ring'ahao,  
Aroba bibalrangni simila on'ahao,  
Dal'dalgipa kenbegni burung ning'tuao,  
Aro uuon jokenggipa chiring chimikrango.

Salni raka, jani nom'a rikrak teng'suao,  
Andalao askirangni ching'chet ching'chetao,  
Balwarangni, chibimani ka'sin'jrim jokangao,  
Chel'beani tom'tomgipa salgi tangsimao.

Rinok rinok gipokgipa suurini biaprango,  
Chibol duule barirango a'gisi jatchirango,  
I'no u'no chichangrango sagalni ka'bak dal'ao,  
Aroba a'an' kosak chu'batgipa a'bri tangsekao.

Aramrangni riting riting bilangengahao,  
Riprap teng'e jimbeemung mikka waengahao.  
Gimikko niko, ma'sie ra'o ka'tong jrim jrim daka,  
Unonsaan ong'atgipako gisikra'nan ga'aka.

## **Gong·rakbatgipa**

Tangsek 'brirang chua ona pilakchin wilwilao  
Jeon rama gongge gongdang bon'eachim bano.

A·bri kosak rama daka basakobara ka'ma.  
Basakoba iachipak ba daka uachipakna.  
Basakoba ro'ongari a'briui ning'a gita  
Aro joljol dakpretanga burung ning·tubegipa.

Pilakkon janggal done mikkangchi kate kate  
Gari angni tarakbee aroba mailrang bate.  
Indioba ang' nikani darangna gong·rakte  
Gari aro ang an·tangko ki'sangchisa watbae.

— — — — —

## Ding'karini sal

Ding'karini sal ; wa'alrang pilakchian gipa  
A' bri, a' ba nigitoa on'tisa chiko man'na.

Berurua rama joljol an'chengrara ja'pao  
Budepa saksa re'baenga am'bol un' pakkreo.  
Matchu mangsa chel'beao un' buduko chotate  
Bolni ja'ting jagringona sepange re'bae.

Matmaranga chiringosa ding'a amchakjae  
Janggilora do'orang roa jo'ongrangko cha'e

Do'reng mangsa bildoenga a'gilsakko wate  
Burung bolgrim jrip dakjok maiba a'selna kene.  
Balwarangni balbaaoba ding'a gapjok  
Denggugipa ding'olrangde angko sosiatjok.

-----



## Matchok bi'sa

Matchok jaksɪ ding'beengo saljatchio re'baa  
Kenmangija chiko ringna burung ning'tuaona.

Gona amon mikjapsanon katjok samtangtango  
Nikaiaha matchok bi'sa antangni sepango.  
Katbaengachim ia ramio, da'nang angko nike  
Be'en moe katna amjok kenanian gape.

Gona dakon angko nia mɔ'gri pagri gita  
Joknasie mikronrango uni mikchiranga.  
Skatangan jakwataha paiko rim'aoni  
Slaiko gale dangtapaha ka'sine uko jakchi.

Janggilora slaiko kee, bi'sako ka'bako done  
Matchokrangni katangramaon antangan re'bae  
Bi'sako done re'bapilon chel'ao nikatjok  
Niatemung angchiniko mikchirang ong'katengjok.

— — — — —

## **Ma'gipa**

**Ka'sako am'e am'e pilakchian a'gilsak gimiko  
Sokbapilna nangchongmota ma'ona ben'chotao.**

**Bebera'e ka'saaniko jerangnaba on'a  
Bon'manahao saksan gale gimikan kattoka.  
Ka'tongtangni bilrangkode on'e gipinrangna  
Bilgri ong'e bi'ahaoba man'pilani dongja.**

**On'e ma'ni ka'saani dongja man'pilani  
Bilbeata ma'a pangnan da'nang uarangchi.  
On'kange un' sukrangko ua chingko nitoata  
Unan chinga ka'tongtango ma'na ka'sabata.**

-----

## **Mandesal ong'bo**

*( Bi'saskarangna segimin )*

Kakket ka'saaniko nangnikode mandesal ong'bo  
Dala chona nama kamko pangnan mesokrongbo.

Taj gita nokko rikna bang'a bilsi nanga  
Dikdiksaba nangja uko bnekate rona.  
Nangijachi maibakode noksan ka'panabe  
Man'genode ong'giminko rikna re'pabone.

An'tang mikkimko ra'baanina bang'a somoi nanga  
Indioba dikdiksaba nangja uko pena.  
Rasong man'na aro chuna saoba sikpaode  
Dala chona sakantinan apsankon on'bone.

-----

## **Oh Isol ! pilakon Na'a donga**

Gisiktango Nang'ko wate sawa katna man'a  
Wilwila ia a'gilsako jeoba Na'a donga.

Katangmiting ramadilo chadengdikahaode  
Ro'ongchi ja'arango sadikata man'e  
Sadikani gita Na'a dongnue rong'teon  
Cholko man'e nappilaia darangni ka'tongon.

Ding'beglpa sal ong'e ding'ol Na'a pilakni  
Ong'kataia chripchrip dake be'en bimangoni  
Ua gitan jagringo Na'a balwa ka'sina gita  
Jrimjrim dake balanga ding'olko ran'atna.

Kenbegni matburung baksa burungo Na'a donga  
Aro rama bon'kamgipao batnaba sagal gita  
Neng'beemung noktangona chingni sokbapilahaon  
Sengsoa namgipa gita pilakni tusiahaon.

— — — — —

## **Ka'saania namjabea**

Ka'saania namjabea ine haida skang ma'siode  
Mamung saloba dakjawachim angara indide.

Mikronranga kana ong'a nikna on'jachina.

Taningara rong'tepila u'ina man'jachina.

Rama joljol ja'arang re'ja, burung joljol re'a

Kamrang ka'na jakrang sikja da'nang uarangna.

Salko nika wal gita, busukode bibal

Mi-bijakko bisi gita, chikoara wa'al.

Maiko dakna bachi re'na neng'a ka'tongtang

Gisiktango ong'rongbata kamrang bilding bildang.

-----

## **Ang' ka'satang**

Ua chel'beao tangsekgipa a'brini pil'sao  
Donga songsa jeon donga ang' ka'satang uno.

Nikna sike na'song saoba uchi re'angode  
Pilakan ong'katbagen rimchakna ka'sabee.  
Mikkang sila ka'dingsmita mikron mikbokaigen  
Uangnok ang' chamea nikon na'a u'igen.

Sambaona re'baoba gisiknangnabene  
Ong'jaode katgen kratcha'e matchok gita kene.

Uni bimang nitoako nikna sikgenode  
Re'bo chiring rikamona atamo senggnange.  
Ua auna re'baronga ripeng silgiparang baksa  
Jemung na'a tona man'gen uani nitoa.

---

## **Ka'satangni nitoani**

Ka'satangni nitoako maichi parakna amgen  
Gisiktangsa u'iaia silchongmotako namen.

Andalbean' ning'tuao gisima knirango  
Pangnan donga u'igija parakatani uno.  
Un' mikron wa'tre bijak ganda mikbokatani  
Mesokata rinok rinok pangnan togiani.

Un' angil nitoara tosusanaan dongja  
Un' pe gitchakko nike darangan gitokran'a.  
Un' ja'ku ga'angani ja'gaman ma'gaprikja  
Ka'sinbee jrim jrim dake balwa balbaa gita.

-----

## **Ka'tongtangko on'a unan**

Atam salni napangengao  
Salgi gitchak dakangao  
Nikchengesa unon rang'san  
Ka'tongtangko on'a unan.

Uni be'enrang jiljo moa  
Re'angengen chroksoa  
Niko ukon mikjapsana  
Mikronranga mikrimila.

Un' mikkang bimangara  
Gisik' salna man'bara  
Gisimgipa knirangba  
Balwarangmung kal'grika.

Ka'sinbee ja'ku ga'a  
Pil'e pil'e nirokroka  
Rinok ku'chil ka'dingsmita  
Ka'tong' cha'una changgipa.

— — — — —



**Gisikra'ama chame**  
*(Ka'satangna segimin)*

Gisikra'ama chame angko nikchengani walko  
Jeni walo nang'na on'a ka'saan' ka'tongtangko.

Un' walni teng'suara jeon jumang gita  
Nitodapataha nang'ko mikron nikanina  
Gualpile ang' an'tangko tiktak un' somoio  
Kratcha'gija sokbaaha maika'e nang' sambao.

Nang'ni ka'saan' churi pongchi angko pekataha  
Walgimik jeni a'sel nang'mung ropaaha  
Seng'ba jrangjrang dakbaahao jajong napangaha  
U'iaijok uanosaan nang'mung ka'sagrikaha.

-----

**Anga namen dingtangaha**  
*(Ka'satangna segimin)*

**Anga** an'tang mamungoan namen dingtangaha  
**Jensalo** ang' ka'tongtango na'a napeaha.

**Skang** angmung tosusana darangba dongjachim  
**Kenna,sina** mamungkoba gisikan ra'jachim  
**Kenanirang** da'o angko pilakchin duulenga  
**Gisik** maikoba gimaatna jajrengohipchipaia.

**Singho** gita bilakachim angade skango  
**Mat** gita kenrakhgipa ong'na nangjok da'o,  
**Ka'tong** rongchu suani'n dondikja bikao  
**Maiba** a'sel re'bagenkon mikkangchi ja'mano.

— — — — —

**Badine anga parakgen**  
*(Ka'satangna segimin)*

Badine anga parakgen  
Maina nang'na ka'saa  
Sawa aganna amgen  
An'tang ka'tongko on'aha.

Saoba angni mikronchin  
Nikgenode o, nang'ko!  
Tona dongja darangchin  
On'kanggenchim an'tangko.

Saoba angni ka'tongko  
Done an'tang gisiko  
Man'gen unon chanchina  
Maina nang'na ka'saa.

---

**Changni chang nang'ko nikengon**  
**(Ka'satangna segimin)**

Changni chang nang'ko nikengon  
Nika sile nang'ko salprakon.  
Changanti nang'ko niaton  
Bon'ja nitoanian nang'o.

Je ramakon na'a repaka  
Pilakan nitoana rimchaka.  
Bibalrang sinilachi ku'dimna  
Balwao watata uko nang'na.

Ripamchi nang' ja'suata  
Rorengreng ja'a nitobea.  
Samsirangba ska sipana  
Nang'ni ja'ku ga'an' kokkima.

## **Nape na'a waljatchio.**

*(Ka'satangna segimin)*

Nape na'a waljatchio angni kuturio  
Cha'uangjok tusimiting angni ka'saako.

Duk ong'bee grapan ja'man noksulrang re'bajok  
Ong'katbaa sandiemung cha'ua bachijok.  
Bon'chotao jako on jok ong'kate dongnuaoni  
Indioba jakrarasa nikjok bimang nang'ni.

Bichal gita jekon cha'ua ukon on'pilode  
Watgen nang'ko jakgitele on'tisa gro ra'e.  
On'piljaode jringjrot patok sikdik ang' ka'tongo  
Nanggen dongna man'ja jokna pangna jolnan uno

— — —

## **Jajong namen denggubea.**

*(Ka'satangna segimin)*

Jajong namen denggubea maina bakbak nabaa  
Damsan asongako nike pilakan matnangchina.

Miknengesa ta'arakbee nabaa dakgalgala  
Tona amja nang' mikkangmung jajongni nitoara.  
Teng'sue nabaa mikkang simchina kratcha'e na'a  
Nang'ni mikronrangni nikao nitogija dakatna.

Indioba inon na'a ang' ka'bak jagring baksa  
Dongnubone ang' ka'bako jajong napangkujana.

Indimangba pring seng'oba ua re'angujaode  
Aro nang' noktangchi re'na cholko on'kujaode  
Indakode knal an'ching uko a'jak sokskagen  
Un' mikkangba dak bang'bea pilaknan agantokgen.

— — —

**Gisik nanggija nang' kamchi.**

*(Ka'satangna segimin)*

Gisik nanggija nang' kamchi bang'en mesokoba  
Nang' ka'tongo jeba donga gipin ong'ja anga.

Pangnan nang'ni sepang re'bao na'ade jite kata  
Ang gipakna dakmitingo na'ade chel'e kata.  
Dakmikasa jedakode nang'ko draachina  
Draachi sepangatna bate skang changna.

Ka dingatna joton ka'o na'ade grapskaa  
Maiba nama kamko ka'o na'a ka'dingskaa  
A'sel ian nang'ni budhi, bang'e ka'dingatkan,  
Ang an'tangko bilakate mingsingbatatkukan.

---

## **Silchidarerang nangjawane.**

*(Ka'satangna segimin)*

**Silchidarerang nangjawane angko sason ka'na  
Nang' mikronrang, kurchilranga bata uarangna.**

**An'tangkon ang gualpila nangmung roengon  
Sikgenode aganatna maikoba nang'na unon  
Aiao inman'pilgipade nang'ni mikronranga  
Mikjapsano dontongata kartongko parakna.**

**Chanchioba nang'ko wate anga chel'e re'na  
Indioba changgipasan nang'ni ka'dingsmita  
Ong'ata pagila angko janggitangko on'kangna  
Wa'al gita nang' ka'saanio bilpruemung sina.**

— — —



## **Ong'telgipa nitoako na'a taridape**

*(Ka'satangna segimin)*

**Ong'telgipa nitoako na'a taridape**

**U'iatja da'alo angko metra jinmao donge.**

**An'tang ja'o ja'chong chua jutarangko gane**

**Bag ararako jako rare, barra chondokko gane**

**Nagandea gita aro knitangko dakjea**

**Kratgri saksa skangnian nikronggija gita.**

**Mikkangko namatjaha na'a powder, snowko nonge**

**Miksramo kajol aro kurchilrangko gitchakate**

**Dolly baby gita da'alo nitobatat kue**

**A'sel silarangkon watjok antingan gualc**

## **Bachinasa re'angenga**

*(Ka'satangna segimin)*

**Bachinasa re'angenga ta'arakbee indake  
Re'angengon ki'sangchiko na'a nipilnipile.**

**U'ijama ramadilo badita mande bang'a  
Re'angenga re'baenga nang' re'a rama gita.  
Maiba ka'e chatingode nangipa manderangko  
Maibakode chanchigenkon nang' nipilrokrokako.**

**Chatingemung na'a uno ga'akna nanggenode  
Kratchabratcha nang'ko sawa dechaogen Indide.**

**Ka'sapae nang'ni kni sakako tiktak donpabo  
Janggilchiko pil'e pil'e nang'ni nipilmitingo.  
Doka gita nangchongmotode re'pakgipa saobako  
U'ignokde pilak mande nang' nipilsimsimako.**

— — — — —

## **Na'a re'bagen**

*(Ka'satangna segimin)*

Na'a re'bagen ine ku'rachakangaha  
Sengen sengen walseng'esa mikron champilaha.

Skang intal nang'ni gimin anga u'iode  
Angko tole ronamangmang aganmikanode  
Wal gimik neng'pilemung dongna nangjawachim  
Sikdik bangbang ia biapo senghajawahachim.

Jarambongni nitoako indake re'ataha  
Atamoni seng'baona ka'dongani baksa.

Chanchiachim re'bagenkon walseng'ahao  
Ong'gramaijok ka'dongsoa indaka a'selo  
Do'orangde re'angpilo angko ramadilo  
Grongenba ka'dingsteka uarangni ku'siko.

-----

## **Anga nang'na baditaan ka'saachim**

*(Ka'satangna segimin)*

Anga nang'na baditaan ka'saachim ka'saade  
Indioba ian nang'ni nikao namjaode  
On'bo angna rakbatsranggipa maiba sastiko  
Jekon chakto-dongtogija ine na'a chanchia gisiko.

Anga nang'ni sepangona sepange re'baode  
Rikgalatbo angko na'a mitchian gapode,  
Nang'ko nina srik srik senge nang'ramao dongode  
Kanaatsrangbo ang' mikronko ka'sapae na'arane.

Nang'ni jumangoba angan dongdikatbeode  
Tusibewaltangkon watbo ninan siksrangjaode.  
Indioba pangna jolna angko jumang nikgen  
Jeni a'sel ka'sae anga nang'na pangnan donggen.

---

**Jensalo nang' ka'tong bario.**

*(Ka'satangna segimin)*

Jensalo nang' ka'tong bario bibalrang balchimtokgen  
Ma'sibone chame na'a angaba re·bachongmotgen.

Unsalo salgi tangsim namen rongtalbegen  
wilwilao balwarangba namen simlbegen  
Rama samtangtango pulrang pilakchin nitoatgen  
Samdimrangba ramarangkon namen silatbegen.

Bibalrangni rongrangara pilakchian gipgen  
Bijarangba kal·grikemung bitchi uno opgen  
Me·pliprang kusi ong'e bilroroe rogen  
Changni changa pulrang' peon ku'dimetaitaigen.

**Chame na'a napna amgenode**  
*(Ka'satangna segimin)*

Chame na'a napna amgenode aiao inmanpil'gen  
Salgi gita nikwatsokja ang' ka'tongko nikgen.

Ianoba salo teng'a sal dal'begipa  
Bilakbea wa'al gita pilakchin teng'brapila.  
Balminduri bnekata kenatani gita  
Gisep aram gisim ga'aka dukni mikchi gita.

Sundareba i'no donga un' rongrang baksa  
Atam joko saliramchi salgi gitchak daka.

Chansokgija askirangba iano walo re'baa  
Un' baksa jajong gisep rinok rinok teng'a  
Silbatgipa jora jora rogipa mikronrangna  
Jumang name nikpachina uamangna on'a.

—————

## **Simsakgija maina on'jok.**

*(Ka'satangna segimin)*

Simsakgija maina on'jok nang'ni ka'saako  
Jagokatna kangal cholgri mande ang gitako.

Gamchata nang' ka'saako bano rakkikuna  
Jagokani ja'man ja'man kenanirang gapa  
Naljokate rakkidonna biapko am'e neng'jok  
Namnikgipa biapkode am'e ong'gramaijok.

Bon'chotao biap angni ka'tongni noktopo  
Kenbeoba donaiaha cholgri ong'e u'no  
Dongtimaha walangsalang tusigija dake  
Kenbeemung nitimrokjok cha'urangna kene.

— — — — —

## **Maina jripjrip parakgija**

*(Ka'satangna segimin)*

**Maina jrip jrip parakgija bang'a katta baksa  
Donnuenga drae an'tang dambeni nitoa.**

**Gipatpabo ua kattarangko jeoba a'palo  
Bibal gita satpripabo duulenba angko.  
Kolamemung anga ua pilak kattarangko  
On'bo nitodapatna nang' nitogipa ka'tongko.**

**Jakgitele jokna on'bo nang'ni damben' salko  
Aro angko re'angatbo nang' janggin' chi-ramao  
Jeon anga balboange sokanggen urona  
Nikwatsokja nang' ka'tongni tu'bea sagalona.**

— — — — —



## **Rama brange sokeaha**

*(Ka'satangna segimin)*

Rama brange sokeaha apsan biapona  
Mejal walo jarambongo nang'mung roramona.

U'no i'no ua biapni pilakan chinrangsa  
Mejal walo sakgnitang roan' sakirangsa.  
Gualement chanchienga anga changni chang  
Da'omangba dongengakon na'ade angmungan.

Tangsekgipa samsirangni biap rimit piljok  
Jeon an'ching sakgnian damsan asonge rojok.

Je bolni cheksiko na'a angna kratcha'e  
Rim'e donga angko niko angoni chel'e  
Ua bolni bilalranga ka'dingstekenga  
Na'agrisa saksan angko uano nikenga.

-----

## **Mejal walo je jumangkon**

*(Ka'satangna segimin)*

**Mejal walo je jumangkon na'a nikman'aha  
U'imanjok ang an'tangde na'a parakjaoba.**

**Nambatgipa ba'rarangko na'a ganengachim  
Maiba namkujama ine ainao niengachim.  
Kene niwingwange uno nokni manderangna  
Re'angaha a'palchina da'obatai changsa.**

**Noksulranga urijachina dingtaug ramao re'bae  
Dondikaha biap damsao rangsanang sokbae.  
Bol dal'ani kokkimao saksan na'a senge  
Dongsoengachim unon na'a angna ka'dongsoe.**

— — — — —

## **Nang'ni chiti jumangrangni**

*(Ka'satangna segimin)*

Nang'ni chiti jumangrangni a'song gitasachim  
Jeon anga u'igija songregipasachim.

Un' nitoa nikanichi gisik bringbrang piljok  
Nang'ni nokol kattarangchi angko ripok patjok.  
Ramarangni samtangtangchi namen nitoata  
Dokanrango bosturangchi pilakkon mikbokata.

Salba walba dongja unon teng'a jajongsaan  
Mikronrangna teng'brakgija nikna on'na mangmang.  
Gualement ang' gisiktang bijatchio napjok  
Dilgipagri ong'e anga changni chang brangaijok.

— — —

**Dongpanabe pangnan na'a.**  
**(Ka'satangna segimin)**

Dongpanabe pangnan na'a ripengrangni jatchio  
Maika'e rake okamatgen re'bachina sambao.

Angni budhi dakaniko uamang u'iode  
Uamangko srik srik wate na'aba re'baode  
Mikkang salo nang' ripengrang mangkalake rogen  
Uamangni mikkango na'a kratcha'e sigen.

Drae grongna man'gen nang'ko u'mangni jatchioba  
Jedakeba on'gen uamang nang'kode grongna  
Indioba ong'jawane grongan' kusiba  
Apsan a'sel ong'aigende indake angnaba.

-----

**Maika'e nang'ko Kusi ong'atgen**

*(Ka'satangna segimin)*

Maika'e nang'ko kusi ong'atgen  
Ranggitik man'e cha'na nangode  
Mai boksis nang'na kragen  
Kusi ong'atna anga on'ode.

Bang'bea tangka ba dalanni nokrang  
On'genode anga nang'na gimik uarang  
Ba breemung angni pilak gamchi  
A'song damsa nang'na ka'saachi.

Indioba ka'tongtango chu'ongnikatjaode  
Kangalrangna gamtangko on'osa jaksrame  
Indakemung jakrarasa re'bagen nang'onan  
Ka'tong ka'saako boksis on'na nang'na pangna jolnan.

— — —

## **Na'a angko sing'genode**

*(Ka'satangna segimin)*

Na'a angko sing'genode maina nang'na ka'saa  
Mingsa mangmang aganchakgen, 'nang'ko namnikana

Nang'ni silanasa haida chanchinaba donga  
Tona dongpiljaoba uan dikdiksa salrangnasa.  
Chanchigenchim anga ka'sa'a nang'ni dambeana  
Damben' salrangkamakoba darangan beberaja.

Okkribatsranggipa mande jean ia a'gilsako  
Dikdiksana on'anichi churongnikatja uko.  
Nang' ka'tongnin dambe aro unin nitoana  
Ka'saenga una mangmang angade nang'na.

— — —

## **Kal·grika bibalrang**

*(Ka'satangna segimin)*

Kal·grika bibalrang balwao  
Kusin' baksa ka'tongo  
Roengon nang baksa ang uano.

Na'asan ang' ka'tongni, dongja gipinna ka'saani  
Man'kuja ka'saako darang gipinni  
Ka'dongjaha ka'saa man'na  
Angan chanchia.

On'bone nata angko dongna pangnan ka'tongo  
Amjawa gualna janggi tangengao  
Je ong'china sipilchina  
Nang'nan ka'sara.

— — —

## **Mesokbo maini a'sel**

**( *Ka'satangna segimin* )**

**Mesokbo maini a'sel nang'ni mikkango  
Changni changa dingtangata angko ka'tongtango.**

**Niaton na'a ka'onangmike angko  
Kenchakman'a gimaatna ka'saako.  
Indiba ka'dingsmiton majoata uno  
Sikata sisrangna nang' ka'saan' ka'tongo.**

**Ka'dinga knatoe angni nachilo  
Gam'a salgin' gitrang gita unon.  
Mikchirang jokonengon chanchichipa ang an'tangkon  
Haida nang'ni pilak dukni angni a'selsakon.**

— — —



## **Ang' ka'tongo nang' napachi**

*(Ka'satangna segimin)*

Ang' ka'tongo nang' napachi nang'ko dosi on'ja  
Saoba matnangbegenode uan ang en'tangsa.

Skanggipa ang' janggin' pringni pilak ramao  
Salgi sal gitchake nabaa mknengemung angko  
Pringni ripamchiko nikon aiao inmanpil'e  
Ong'kataha a'palchina ka'tong do'gako oe.

Do'ga oa, mande dongja ia cholko man'e  
Napeaha ang' ka'tongo na'a niwingwange  
Salni teng'a pilakchian rikrak gipahaoa  
Re'bapile nang'ko nikna aiao inmanpil'a.

## **Dongnumika skachim anga**

*(Ka'satangna segimin)*

Dongnumika skachim anga nang'oni dikdik salna  
Kakket ka'saa ba tol'asama nang' gisikko nina.

Salsa salgni indaken na'a salko re'ataigen  
Tol'engasa anga nang'ko indake chanchigen  
Uko dakna chu'sokjae antang skatangan  
Anga re'bapilgen nang'ni ka'saako bi'nan.

Saksan ong'e ja'manosa nang'ni kartong mogen  
Ka'tongtango dukni chika dingokdingok sagen

Pagli gita re'ongkatgen unon angko am'na  
Nikjae na'a re'bagenkon an'ching rorongaona  
Gisikra'e gitcheam salrang nang'ni mikchi ong'gen  
Union anga janggilchini nang' mikron rim'tipgen.

— — —

**Chel·beao donge anga.**

*(Ka·satangna segimin)*

Chel·beao donge anga pangnan chanchia  
Bang·bea kattarangko nang·na parakna.

Indioba anga nang·ni sepang re·baon  
Gualpila maibaka·e nang·ni mikkangon  
Changni changna ong·jok anga jaran jarasa  
Ku·ma gita pangnan uno chadengemung donga.

Silgiparang a·gilsako donga bang·bea  
Indioba na·an bata angni nika gita.  
Ka·dingsmiton gisiktango angko mikmalata  
Chu·sokgija unigimin nang·ko ma·sie ra·na.

---

## **Jarabongni wal ong'ode**

*(Ka'satangna segimin)*

Jarabongni wal ong'ode, sikdik biap damsao  
Pangnan na'a dongpatone angni mikkango.

Asongbo na'a ang' sambengo ba angni mikkango  
Donemung nang' mikronrango angni mikronrango.  
Knatimna man'gen unon ang' ka'tong' kattarangko  
Sengkuenga na'a knana sike je a'selrangko.

Ua walo sikgenode, nang' ka'tong' kattarangko  
Aganbone knatimna gisik nangemung uno.  
Knaangkugen knatoa nang'ni kattarangko  
Walgimik dongemung ang nang'ni mikkango.

-----

## **Chame angna aganpabo**

*(Ka'satangna segimin)*

Chame angna aganpabo san' janggi gamchata  
Me'plipmung hibalni ba angmung nang'nisama.

Nang'ni katta balwarango angko kimalata  
Bibalba me'plipna on'a mikbokatna.  
Ka'donggipa daka na'a donge ang' mikkango  
Me'plipba dakchakana bibal nitoao.

Na'an angni janggitangao ia a'gilsakni  
Bibal rurongkuja dipet janggi me'plipni.  
Sakgnian nangrimaia jedake parakgrikao  
Uarangba apsankon daka maiba chinko nikao.

— — — — —

## **Watnabe jani teng'suon**

*(Ka'satangna segimin)*

Watnabe jani teng'suon na'a saksan angko  
Dikdiksana sepangkubo kusina angni sambao.

Ka'sapae asongpabo jrip jrip ang' mikkango  
Ku'samangba agangija done mikronrang angko.  
Cholko on'bo ringna mangmang nang'ni nitoako  
Chu'ongnika kakketona angni ka'tongtango.

Indaka wala re'bataigen ka'dongani dongja  
Indioba ian choljok an'ching sakgnina  
Gisik ra'gen pangna jolna an'chingni ka'tongo  
Sesoode sakgninan ekgrikna rasongo.

— — — — —

## **Ramara bakrobea**

*(Ka·satangna segimin)*

Ramara bakrobea nang' ka'tongni noko sokna  
Ua u'isranggija aro kenanirangba bang'a.

I'no u'no dikbegipa burungni bu'suchi  
Gin'ataha ba'rarangko pilakkon chotchra chotchri  
An'chiranga jokangenga be'en-ja'aoni  
Matsramgipa bu'su aro rong'te mataoni.

Re'e re'e maika'e anga namen neng'beaha  
Aro rama tong'saon anga an'tangan gimaaha.  
Gimaataha ramatangkon a'gisi bijatchio  
Jeon sianisa donga gitok ran'e uno.

---

## **Mikron pangnan nongna sika**

*(Ka'satangna segimin)*

**Mikron pangnan nongna sika nang'ko kajol gita  
Jeo angni nikaoni jokna man'jachina.**

**Pilak janggi on'sreachi anga nang'ko amjok  
Uni gimin gualachi gimaatna kenjok.**

**Ka'tong patok dal'begipa, unon chipe donna  
Gisiktango sika nang'ko katna man'jachina.**

**Namnikjaoba na'a angko donbo pangnan sambao  
Gisikra'e on'kangako nang'na janggitangko.  
On'sregrikna nangnikode pilak kamrangna  
On'gen angni pilak sukko nang'ni gimik dukna.**



## **Angna ka'sachongmotode**

*(Ka'satangna segimin)*

Angna ka'sachongmotode angni siman'oba  
Nirikpabo jejerangnan anga ka'saaha.

Ang gitaan rongtalatbo jaktangchi ang' dongramko  
Nitogipa pulrang balkan chiko rujringpabo.  
Unon na'a nikna man'gen bimang pilbaako  
Bibalrangni nitoao ka'dingsmit angko.

Angni sontol matchu bi'sa uko aldubone  
Uni saani angni saanin na'a uribone.

Noksul baksa ka'dingsmite agangrikpabone  
Atam jokon pulrangko akna gualpanabene.  
Nitoatbo tuna skang jeon na'a tua  
Kakketachi Un' gisikra'a Jeon anga re'a.

—————

**Nang'ko wate gisiktango**  
*(Ka'satangna segimin)*

Nang'ko wate gisiktango pangna chel'na amja  
Joton ka'oba bang'a changon nang'chin sokpilaia.

Balrroko balrro gita on'tisaba nikja  
Be'ekpila na'agride ua salrang angna.  
An'tangkoba gualpila anga bano donga  
Chanchisokja maika'e ua salrangko batangkuna.

Chel'beaoni daman' sulrang ka'tongko be'atani  
Re'baade bnekate sikdikako walni  
Bnekatna ang' ka'tongko angni neng'pilao  
Jensalo anga saksan, na'a angmung dongjao.

---

## **Re'baachim grongna nang'ko**

*(Ka'satangna segimin)*

Re'baachim grongna nang'ko maina ong'katjajok  
Bang'a changna doktikan ja'man anga re'pilangjok.

Chanchiachim okamatna nang'ko a'palchina  
Indioba kratcha'mana nang'ni noksulrangna  
Neuatna kelki gita gisiko skengon  
Kena anga chanchichipna angko cha'usakon.

Nang' nokni do'gacholo doktika dongjahaode  
Haida na'a ong'katgenkon ka'o bu'su bue  
Nikaigrok na'ade uno angni ja'kolkosan  
Do'gacholni ga'timramo chanchie gisikosan.

— — —

## **Simila pul bibalrang**

*(Ka'satangna segimin)*

**Simila pul-bibalrang**

**Sikdik wal andalao**

**Chanchiesa unon**

**Nang'ko gisiktango.**

**Teng'enga askirang**

**Chel'bea salgio**

**Nionenga u'rang**

**Saksan ripenggrio.**

**Ning'tua burung bolgrimo**

**Do'drang nikenga jumangko**

**Seng'watrang wa'al nate nate**

**Am'a ka'satang gimaate.**

**Ka'sinjrim balwa balbae**

**Nangjok bolni cheksirango**

**Agana srik srik nachilo**

**Bringbrangjachina gisiko.**

**Senge senge oh, nang'ko !**

**Seng'ataijok walko**

**Man'jok gisik dukko**

**Ong'gramaijok da'alo.**

**Nisoe nang' mikkangna**

**Ka'saa ang jena**

**Re'bajaha maina**

**Angna mikkangpana.**

## **Baditaan Ka'saachim nang'na**

*(Ka'satangna segimin)*

Baditaan ka'saachim nang'na ang' ka'tongtango  
Changale indioba nang'ni u'igija dakaniko.

Chel'beao basakoba nang'ko nangnikoba  
Mikjapsano nang'ko man'a angni gisikona.  
Gipin mamung golmalgrian nang'mung jekoba **dakna**  
Ba damsan asonge namedake suk-dukko parakna.

Nang'ko nikna nangja re'na nang' mikkangona  
Gisik mikronrang baksa pangnan nikna man'a.  
Bebera'jaode na'a nachilko done ang' ka'bako  
Knatimna man'gen apsankon ang' rangsitaoniko.

---

## **Anga angni sukrangko**

*(Ka'satangna segimin)*

Anga angni sukrangko pilakkon on'kangaha  
Ka'dingsmita nang' ku'chilrangko bate ching'batatna.

Salrang walrang wataha nang'ko chanchie  
Kusi ong'na janggitango nang'mung ka'sae.  
Miksongemung na'a angna gimik dukrang on'a  
Indiba ang ra'chakrikjok u'rangko boksis gita.

Nang'na ka'saaniara ong'a bibal ang' ka'tongo  
Bu'su gita un' wilwilao dongen ua dukrangko  
Jedakode gipin saoba amjawa uko akna  
Batsotange bu'sugrimko jakrangchi kal'akna.

---

## **Nang'ni bichal gita**

*(Ka'satangna segimin)*

Nang'ni bichal gita anga chaktoatjaode  
Nang' chu'ongnikatna nangko watna on'pabone.

Basakoba gualemung na'a brangode jangin' ramao  
Ka'dongsoe nidoatbo na'a nang' ka'tong' salgichiko  
Jeon rongsa mangmang ching'gipa aski gita  
Teng'sue anga donggen unon nang'ko dilatpana.

Basakoba aram gisim kosakchini re'bagenode  
Ara nang'ni ka'tongtango wilwile pindapbaode  
Chel'atangbo dakchakachi balwan gisik ra'ani  
Unon angni gisik kusi man'gen chel'beaoni.

---

## **Angna agangija**

*(Ka'satangna segimin)*

Angna agangija na'ade angko watgalaha  
Ka'tongtango namnikjaode maina skang ka'saa.

Saksan ong'e dongodeba nang'ko dosi inja  
Indioba jumang nika nang'ko bon'changkuja  
Katta bang'en dongengachim nang'na agankuna  
Knagija re'angaha na'ade indiba.

Sengkuenga anga jedakeba gimik ma'siatna  
Jensal na'a re'bapilgen an'tangan angona  
Un' salo na'a gisikra'gen an'tang gualako  
Jedakeba ekna man'ja kakket ka'sahahao.

---



**Sengsoa oh ang' ka'tong**

*(Ka'satangna segimin)*

Sengsoa oh ang' ka'tong  
Nisoman'a nang'ko gisikon.  
Tangsima salgiranga  
Walsimsimbaon nang'ko gisikra'a.

Tuna dako tunapja gisik subile  
Mikkang mikkol tupila chanchirikite.  
Chame ! oh ang' chame !  
Angko saksasan done  
Donga banosa gose na ade.

Ka'dingsmit nang' bimang sokbaa gisiko  
Gisikchi roatman'a damsang nang sambao.  
Aiao, bogen ang' ka'tong  
Nang'ko mikkang nikjaon  
Sinjeta dukchi pangnan ka'tongo.

— — —

**. Gisik maina dingtang ong'jok da'alo**

**(Ka'satangko gisikra'ani)**

**Gisik maina dingtang ong'jok changni changna da'alo  
Saoba sikbee gisikra'akon angni nıkgıjao.**

**Balwa maina ang' mikkango balgıja dondika  
Similgıpa pulrangbanı balgaogıja donga  
Jajong maina nabaemung angko teng'sudapja  
Andalani kenanirang angko duule donga.**

**Oh a'bri chingni saki da'alo maina jıpa  
Kobor na'a man'soama skang ang sokbana  
Re'bajaode pangnan jolnan ua ıanona  
Mesokpabo bagıta re'na u ko grongpana.**



**WILLIAM NAGAR**

**This book must be returned within 15 days  
from the date of issue.**



---

A'chik ong'gijagipa manderangna :—

## **Garo Bhasa Siksha**

( A' ' 'k ku'sikko skie ra'ani )

*Segipa*— **Pranesh Kar.**

---